


TEZAUUR LITURGIC
29 OCTOMBRIE

ACATISTUL
SF. CUVIOS
AVRAMIE
DE LA ROSTOV



MOSCOVA, 2000



Акафист

святому преподобному

Аврамию, архимандриту

Ростовскому

Кондак 1

Избранный добродетелей подвижниче и учения Христова проповедниче, преподобне отче Аврамие, похвальная восписуем ти по достоянию; ты же, яко имеяй дерзновение ко Христу Богу нашему, способствуй нам твоими молитвами спастися от всяких скорбей и бед и озлоблений, да зовем ти: Радуйся, преподобне отче Аврамие, великий и преславный Ростовский чудотворче.

Икос 1

Яко ангела земнаго, яви тя граду Ростову Царь ангелов: провидев твое от идолослужения к Нему обращение, непостижимым образом призва тя из тьмы в чудный Свой свет; нас же

величающих неисповедимую благодать Его, научи
взывать тебе таковая:

Радуйся, от утробы матерней Богом
предъизбранный;

Радуйся, благоволением Сына Божия от
нечестия ко благочестию от юности
призванный.

Радуйся, пламенную любовь ко Христу
явивый;

Радуйся, иноческое житие до конца
возлюбивый.

Радуйся, языческаго нечестия ревностный
обличителю;

Радуйся, добрый ревнителю христианския
веры.

Радуйся, преподобне отче Аврамие, великий
и преславный Ростовский чудотворче.

Кондак 2

Видяще родители твои тебе, преподобне, на
долзе времени в лютом расслаблении суща,
недоумеваху; обаче прелестию многобожия зело
ослеплени бывше, не возжелеша обратитися к
единому истинному Богу, подающему всем

страждущим скорое исцеление, и вкупе с тобою воспевати Ему: Аллилуиа.

Икос 2

Разум недоразумеваемый о несозданном Божестве уразумел еси, преподобне, и положил еси в сердце твоём обратиться ко Христу и последовати Его учению. Темже мы, чудящиеся о скором твоём на лучшая преложению, дерзаем восхваляти тя таковыми гласы:

Радуйся, земле благая, приявшая семя небеснаго учения;

Радуйся, свыше удостоивыйся Божественнаго просвещения.

Радуйся, ниво, произрастившая клас живыя веры;

Радуйся, сосуде, исполненный благодати обильно.

Радуйся, крине, возникший посреде терния;

Радуйся, звездо, возсиявшая во тме языческаго нечестия.

Радуйся, преподобне отче Аврамие, великий и преславный Ростовский чудотворче.

Кондак 3

Сила Вышняго внезапно найде на тя, преподобне, и стягну состав тела твоего. Ты же, восстав от одра твоего, аки николиже болевый, в радости неизглаголанней, благодаря безмезднаго Врача твоего, Его же прежде не ведел еси Иисус Христа, возопил Ему: Аллилуиа.

Икос 3

Имея помышление в сердце своем еже послужити Христу, даровавшему тебе исцеление, отай изшел еси из дому родителей твоих и прилепился еси ко Христу Господу; тем мы, ублажая благое твое изволение, вопием ти сице:

Радуйся, дом и родителей твоих Господа ради оставивый;

Радуйся, в неведомей ти стране разысканий спасение.

Радуйся, богатство земное ни во чтоже вменивый;

Радуйся, нищету паче богатства возлюбивый.

Радуйся, образе жизни духовныя;

Радуйся, свете, возсиявый из тмы греховныя.

Радуйся, преподобне отче Аврамие, великий и преславный Ростовский чудотворче.

Кондак 4

Буря недоумений смущаше тя, преподобне, еще не крещену ти сушу, еже како получитьи знамение христианския веры. Бог же всякия утехи тайным Своим промыслением приведе тя в обитель иночествующих, да ту возродишися водою и духом, и в чистоте сердца посреде лика иночества воспеваеши Ему: Аллилуиа.

Икос 4

Слышавше братия о пришествии твоём в обитель их, преблаженне, и видевшие тя благоприятна и разумна, прияша с радостию, и крестивше во имя Отца и Сына и Святаго Духа, причтоша к лику своему. Мы же, Промыслу Божию, о тебе явленному, чудящися, восхваляем тя сице:

Радуйся, святым крещением в обители иночествующих просвещенный;

Радуйся, во святом крещении дарами Духа Святаго исполненный.

Радуйся, по крещении образ иноческий на ся приемый;

Радуйся, иго благое Господне на рамо твое
вземый.

Радуйся, яко усердно последовал еси стопам
Христовым;

Радуйся, яко на вся подвиги иноческия
уготовал еси душу твою.

Радуйся, преподобне отче Аврамие, великий
и преславный Ростовский чудотворче.

Кондак 5

Боготечная звезда явился еси, отче Аврамие,
в пределах града Ростова возсиявшая; не терпя
бо славы и похваления человеческого, умыслил
еси сокрытися в неведомыя страны; темже
пришед в чудский конец, вселился еси близ
езера Неро в пусте месте, идеже идол Велес
стояше, емуже неразумнии людие покланяхуся,
ты же верою крепко воспевал еси Богу:
Аллилуиа.

Икос 5

Видевше благоразумнии и богобоязненнии
людие града Ростова уединенное и
благочестивое по Бозе житие твое, зело
возлюбиша тя и попремногу чествоваху. Темже
и от нас приими похвалы сицевыя:

Радуйся, пустынное житие о Бозе
возлюбивый;

Радуйся, древним пустынножителем добрый
подражателю.

Радуйся, искушений лукаваго врага крепкий
борителю;

Радуйся, в трудах и подвигах рано Господеви
Богу послуживый.

Радуйся, яко в посте и молитвах выну
пребывал еси;

Радуйся, яко с непрестанным бдением и
Богохвалением безплотным поревновал еси.

Радуйся, преподобне отче Авраамие, великий
и преславный Ростовский чудотворче.

Кондак 6

Проповедует радостно град Ростов великия
труды твоя и подвиги, блаженне Авраамие, яже
подъял еси, егда языческое нечестие разрушаше
и в сердцах людей истинную веру и благочестие
насаждаше; едином бо того желанием горяше,
да всех приведеш ко Христу и научиши вкупе с
тобою воспевати Ему: Аллилуиа.

Икос 6

Возсия паче солнца богоугодное житие твое,
всехвальне отче Аврамие, и якоже звезды
небесныя, озариша добродетели твоя землю
Ростовскую, о них же и мы благодаряще Христа
Бога, давшего ти таковую благодать, восхваляем
тя сице:

Радуйся, звездо, во тме греховней
заблуждшим светящая;

Радуйся, лестнице, возводящая последующих
ти по степенем добродетелей от земли на небо.

Радуйся, яко равноангельскому житию всех
образом жития твоего учиши;

Радуйся, яко страсти греховныя
подражающих ти побеждати руководиши.

Радуйся, образе истиннаго смирения;

Радуйся, зеркало истиннаго самоотречения.

Радуйся, преподобне отче Аврамие, великий
и преславный Ростовский чудотворче.

Кондак 7

Хотя Преплагий Бог утешити тя в скорби
твоей и о людех, в зловерии язычеством
погибающих, блаженне Аврамие, посла на

помощь к тебе возлюбленного ученика Своего Иоанна Богослова, яко да укрепит тя к низложению скверного идола Велеса, ты же, жезлом от него вооружен и верою утвержден, в дерзновении мнозе возопил еси Богу: Аллилуиа.

Икос 7

Новаго веры ревнителя, якоже Николая Мир Ликийских святителя, видим тя, богоносне отче Аврамие; яко же бо той, ревностию Божественною распалаем, капище языческое в Ефесе разсыпа до основания, сие и ты богомерзскаго идола Велеса во граде Ростове силою крепкаго сокрушил еси; сего ради по достоянию прими от нас похвалы сиевыя:

Радуйся, святому Иоанну Богослову собеседник быти сподобивыйся;

Радуйся, благодать и силу с жезлом от него приемый.

Радуйся, яко сим жезлом сокрушил еси скверного идола Велеса;

Радуйся, яко вельми посрамил еси обитавшаго во идоле исконнаго человекоубийцу.

Радуйся, яко на сем месте храм и обитель святую во славу истиннаго Бога воздвигл еси;

Радуйся, яко zde пристанище благоотишное
обуреваемым молвами житейскими уготовал
еси.

Радуйся, преподобне отче Аврамие, великий
и преславный Ростовский чудотворче.

Кондак 8

Странное чудо видеvше в храмине твоей
благовернии Князие, пришедше благословение
от тебе по обычаю прияти, егда дым чермн и
смраден зело изыде от умывальницы твоея,
ужасошася. Ты же, уразумев злоковарнаго
лукаваго духа действие, поучив Князи опасно
блюсти себе от козней вражиих, купно с ними
возопил еси Богу: Аллилуиа.

Икос 8

Весь равною ко всем горел еси любовью,
достохвальне отче Аврамие, и яко же в животе
твоем, тако и ныне вся верою к тебе
прибегающия, молитвами твоими ограждаеши
от всякаго зла. Достойне убо приемлeши от всех
похвалы сицевыя:

Радуйся, теплый молитвенниче к Богу о нас
грешных;

Радуйся, наставниче, руководяй к небеси верных.

Радуйся, бедствующим многомощный помощниче;

Радуйся, оскорбляемых крепкий покровителю.

Радуйся, посетителю скорый в немощех лежащих;

Радуйся, утешителю благий в бедах сущих.

Радуйся, преподобне отче Аврамие, великий и преславный Ростовский чудотворче.

Кондак 9

Естество ангельское подражая, не усрамился еси, достоблаженне Аврамие, егда по навету всезлобнаго врага приведен был еси в единой раздранней власянице к Великому Князю Владимиру, но паче самаго того врага смирением и незлобием посрамил еси; чесо ради с великою честью в обитель твою возвращися и мир и благословение чадом твоим подавая, в радости духовней возопил еси посреде их Богу: Аллилуиа.

Икос 9

Витийствующий язык не может достойно восхвалити тя, преславне отче Аврамие, многие бо и преславные подвиги в животе твоём совершил еси; мы же, к тебе любовью подвижаемии, во смирении сердца дерзаем воспевати тебе таковая:

Радуйся, возшедый в горний град Господа Вседержителя;

Радуйся, преселивыйся в Царство Небесное.

Радуйся, яко святая твоя душа ныне в пресветлом Сионе вселился;

Радуйся, яко и тело твоё нетлением в обители твоей прославися.

Радуйся, тёплый о нас предстателю ко Христу Богу;

Радуйся, благодать нам от Него обильную молитвами твоими подаваяй

Радуйся, преподобне отче Аврамие, великий и преславный Ростовский чудотворче.

Кондак 10

Спасти хотя душу Гермогена некоего, по действию диаволю в сомнение о тебе впадшаго,

досточудне Аврамие, мало неколико дней наказав, за молитвы братии обители твоея паки помиловал еси. Он же, познав свое согрешение, прослави тебе незлобиваго благодетеля своего, и Богу, тобою чудедеющему, возопи: Аллилуиа.

Икос 10

Стена граду Ростову ты еси, чудотворче святыи Аврамие, и всем, прибегающим к тебе, надеждо крепкая и заступление. Темже и нас, любовию ублажающих тя, от недугов и нужд свободжай, вопиющих тебе таковая:

Радуйся, стено нерушимая града Ростова;

Радуйся, забрало собранного тобою стада духовных овец.

Радуйся, во правоверии стоящих незыблемое утверждение;

Радуйся, во благочестии ходящих крепкое ограждение.

Радуйся, поборниче крепкий ведущих брань к духовом злобы поднебесным;

Радуйся, вождю премудрый, путь прискорбный и тесный шествующим показуяй.

Радуйся, преподобне отче Аврамие, великий и преславный Ростовский чудотворче.

Кондак 11

Пение всякое не довлеет к похвале твоей, преподобне отче Аврамие, кто бо возможет по достоянию прославить многотрудное житие твое или восхвалить подвиги твоя, яже по вся дни и нощи в постех и бдениих, стояниих и коленопреклонениях богоугодне подъял еси, их же ради предстоя ныне Престолу Божию на небесех, со всеми святыми поеши Христу Богу: Аллилуиа.

Икос 11

Светозарное светило, не точию град Ростов озаряющее, но и вся грады и страны Российския просвещающее, зрим тя, светоявленне отче Аврамие; с невестественными бо Ангельскими светы предстоя Троичному несозданному свету, и от него Божественными лучами осияваем, облиставаеши верных, вопиющих ти сице:

Радуйся, светильниче, добродетельми
светящий;

Радуйся, молитвами твоими нас
ограждающий.

Радуйся, свете, плавающих в житейском мори освещающий;

Радуйся, светением твоим безбедно преплывать от мира к небеси направляющий.

Радуйся, святынею твоею град наш присещающий;

Радуйся, чудесы твоими вся концы озаряющий.

Радуйся, преподобне отче Авраамие, великий и преславный Ростовский чудотворче.

Кондак 12

Благодать данную ти от Бога сведуще, и на твое мощное к Нему предстательство уповающе, умильно взываем к тебе, чудотворче святой, моли неисповедимую благодать Его, яко да избавит нас, недостойных раб Своих, от искушений вражиих, да прелести его избавльшися, чистым сердцем и не скверными устнами воспеваем Богу: Аллилуиа.

Икос 12

Поюще твое честное преставление, чтим радостно по долгу память твою, и к твоему цельбоносному гробу припадающе, благодарение приносим, яко и по преставлении твоём нас не

оставляеши, но милостивно призираеши,
посещаеши и заступаеши; темже слышиши от
нас таковая:

Радуйся, в мире и радости духовней от
обители твоея на небеса преселивыйся;

Радуйся, лику избранных тамо
приобщивыйся.

Радуйся, яко в сонме их предстоиши дивному
во святых Богу;

Радуйся, яко лицем к лицу зриши
неизреченную славу Его.

Радуйся, яко тело твое святое нетленно
обретется на земли;

Радуйся, яко тем возвеличи Господь обитель
твою и град наш.

Радуйся, преподобне отче Авраамие, великий
и преславный Ростовский чудотворче.

Кондак 13

О преподобне и преблаженне отче Авраамие,
свительниче града Ростова! Нынешнее наше
приемый приношение, принеси теплую молитву
твою ко Господу, яко страну нашу да избавит от
всех врагов видимых и невидимых, от

нашествия иноплеменных, от недуга и глада, от всякия скорби и смертоносныя язвы, и будущия изми муки всех вопиющих к Нему: Аллилуиа.

Этот кондак читается трижды, затем икос 1 и кондак 1

Молитва

О преподобне отче наш Авраамие! Не забуди нас, но поминай всегда во святых твоих и богоприятных молитвах стадо твое, еже сам собрал еси, и моли за ны, чада твоя, отче священный, яко имеяй дерзновение ко Господу; не мним бо тя мертва суща, аще и преставился еси от нас, пастырю наш добрый. Се мощи твоя святая пред очима нашими, святая же твоя душа, со ангельскими безплотных лики Престолу всех Царя предстоящи, достойно веселится. Испроси убо нам время на покаяние, яко да возможем невозбранно прейти от земли на небо, и вечныя муки избавившеся, Небеснаго Царствия наследники будем со всеми праведными, от века благоугодившими Господу нашему Иисусу Христу, Емуже подобает всякая слава, честь и поклонение со Отцем и Святым Духом ныне и присно и во веки веков. Аминь.



ПОЛНЬІЙ АКАФИСТНИК КАНОНИЧЕСКІЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО